

Evening Dogri (NSD) Bulletin 17-07-2025

आकाशवाणी

खबरां -----

1. विदेश मंत्रालय नै अज्ज आखेआ ऐ जे यमन च निमिषा प्रिया दा केस इक संवेदनशील मामला ऐ ते भारत सरकार मामले च हर चाल्ली दी लोडचदी मदाद दी पेशकश करा करदी ऐ।
2. सरकार नै कृषि युनिवर्सिटीएं ते संस्थानें गी उत्पादकता बढ़ाने पर योगदान दी अपील कीती ऐ।
3. केंद्री कार्मिक, लोक शिकायत ते पेंशन राज्यमंत्री डॉ. जतिंद्र सिंह होरें अज्ज आखेआ जे सरकार नै पिछले 11 बरें च तकरीबन 1600 ऐसे कनूनें गी खत्म कीता ऐ जेडे नागरिक केंद्रित नेई ऐ हे।
4. केंद्री शिडक ते राजमार्ग मंत्री नितिन गडकरी होरें आखेआ ऐ जे इस बरे दे अखीर तगर रसद खर्च 9 प्रतिशत घट्ट होई जाग।
5. राष्ट्रपति द्रौपदी मुर्मू होरें बक्ख-बक्ख श्रेणियें च 78 स्वच्छ सर्वेक्षण पुरस्कार प्रदान कीते। इंदौर गी उप्परोतली 8मीं बारी स्वच्छ शैहर दा पुरस्कार, सूरत दुई थाहरै पर।
6. राश्ट्रीय जांच एजेंसी नै प्रतिबंधत उल्फा (I) आतंकवादी समूह आसेआ लाई गेदी आई.ई.डी. बरामदगी च द'ऊं लोकें गी गिरफ्तार कीता ऐ।

<><><><><><>

MEA-Minister Priya

विदेश मंत्रालय नै अज्ज आखेआ जे यमन च निमिशा प्रिया दा केस इक संवेदनशील मामला ऐ ते भारत सरकार इस मामले च हर लोड़चदी मदाद प्रदान करा'रदी ऐ। अज्ज दपैहरी नमी दिल्ली च मीडिया कन्नै गल्लबात करदे होई मंत्रालय दे प्रवक्ता रणधीर जायसवाल होरें आखेआ जे भारत नै कनूनी मदाद प्रदान कीती ऐ ते परिवार दी सहायता आस्तै इक वकील बी नियुक्त कीता ऐ।

<><><><><><>

PM-Bihar Visit

प्रधानमंत्री नरेंद्र मोदी होर कल बिहार ते पच्छिम बंगाल दी जात्तरा करा करदे ना। अपने बिहार दौरे दरान प्रधानमंत्री होर मोतिहारी च सत्त करोड़ थमां बी मती केई विकास परियोजनाएं दा नींह पत्थर रक्खंगन, उद्घाटन करंगन ते राष्ट्र गी समर्पित करंगन। एह परियोजनां रेल, शिड़क, ग्रामीण विकास, मच्छी पालन, बिजली ते सूचना तकनीक सैक्टरें कन्नै सरबंधत ना। प्रधानमंत्री होर 4 नमिएं अमृत भारत रेल गड्डियें गी बी झंडी दस्सी रवाना करंगन। श्री मोदी होर दीनदयाल अंत्योदय योजना-राष्ट्री ग्रामीण आजीविका मिशन तैहत बिहार दे तकरीबन 61 ज्हार 500 स्वयं सहायता समूहें गी 400 करोड़ रपे जारी करंगन। कल गै प्रधानमंत्री होर पच्छिम बंगाल दा बी दौरा करंगन जित्थे ओहू कई विकास परियोजनाएं दा नीह पत्थर रक्खंगन, उद्घाटन करंगन ते राष्ट्र गी समर्पित करंगन।

<><><><><><>

Bihar-Free Electricity

बिहार सरकार नै अगले म्हीने दी पैहली तरीक थमां राज्य च 125 यूनिट बिजली मुफ्त देने दी घोशणा कीती ऐ। राज्य दे मुखमंत्री नितीश कुमार होरें बिहार असैम्बली चुनाएं थमां पैहले एहदी घोशणा करदे होई आखेआ हा जे इस कन्नै राज्य च 1 करोड़ 67 लक्ख परोआरें गी लाहू मिलोगा। उनें आखेआ जे घरेलू उपभोक्ताएं दी सहमति कन्नै अगले 3 बरें च घरें दी छतें पर ते सार्वजनिक थाहरें पर

सोलर पावर प्लांट लाए जांगन। उनें आखेआ जे कुटीर ज्योति स्थिति स्कीम दे तैहत बिहार सरकार गरीब परौआरें आस्तै सोलर पावर प्लांट लाने दा सारा खर्चा करोग।

<><><><><><>

Shivraj-Bihar

केंद्रीय कृषि मंत्री शिवराज सिंह चौहान होरें कृषि विश्वविद्यालयें और अनुसंधान संस्थानें गी प्रधानमंत्री कृषि धन धान्य योजना तैहत कृषि उत्पादकता बदाने च योगदान देने दी अपील कीती ऐ। बिहार दे समस्तीपुर च डॉ. राजेंद्र प्रसाद केंद्री कृषि विश्वविद्यालय दे चौथे दीक्षांत समारोह गी संबोधित करदे होई श्री चौहान होरें अज्ज आखेआ जे कृषि उत्पादन ते उत्पादकता गी बदाने आस्तै इस योजना तैहत 100 जिलें दा चयन कीता गेआ ऐ जिसे कल केंद्री मंत्रिमंडल नै मंजूरी दिती ही। श्री चौहान होरें विश्वविद्यालय दे छात्रें ते शोधकर्ताएं गी किसानें दे कल्याण आस्तै कम्म करने दा आग्रह कीता। उनें दस्सेआ जे बिहार दे जिलें गी बी कृषि धन धान्य योजना च शामिल कीता गेआ ऐ। कृषि मंत्री होरें आखेआ जे सरकार दा लक्ष्य उत्पादन गी बदाना ते लागत घट्ट करना ऐ।

<><><><><><>

Dr. Jatinder Odhsha

कार्मिक, लोक शिकायत ते पेंशन राज्य मंत्री डॉ. जितेंद्र सिंह होरें आखेआ ऐ जे सरकार नै पिछले 11 बरें च करीब 1 ज्हार 600 नेय नियमें गी खत्म करी दित्ता ऐ जेडे नागरिक केंद्रित नेई ऐ हे। भुवनेश्वर च अज्ज केंद्र सरकार दे प्रशासनिक सुधार ते लोक शिकायत विभाग ते ओडिशा सरकार आसेआ संयुक्त रूप कन्नै आयोजित सुशासन पद्धतियों पर दो ध्याडे दे राश्ट्री सम्मेलन दा उद्घाटन करदे होई सिंह होरें एहू गल्ल आक्खी। इस मौके पर डॉ. सिंह होरें पारदर्शिता, भ्रष्टाचार रोधी उपाएं ते सुव्यवस्थित प्रशासन दे माध्यम कन्नै नागरिकें दे जीवन गी सौक्खा बनाने पर जोर दित्ता जेदे नै शासन च सुगमता ते जीवन च सुगमता गी बढ़ावा मिलोग।

<><><><><><>

Gadkari-Logistics

केंद्री शिडक ते राजमार्ग मंत्री नितिन गडकरी होरें आखेआ ऐ जे इस बरे दे अखीर तगर रसद लागत घटियै 9 प्रतिशत रेई जाग। अज्ज नमीं दिल्ली च इक प्राइवेट टी.वी चैनल च बोलदे होई श्री गडकरी होरें आखेआ जे रसद लागत च कमी कन्नै ीारत दा निर्यात डेढ गुणा बधी जाह्ग। उनें आखेआ जे निर्यात बधने कन्नै रोजगार दे मौके मिलडन ते भारत आत्मनिर्भर बनोग। उनें आखेआ जे सरकार बाद ध्वनि, पानी ते ईंधन पूदूषण नमा भारत गी मुक्त करने दे मिशन पर ऐ।

<><><><><><>

Prez. Swachh Survekshan

इंदौर नै उप्परोतली 8में बरे भारत दे सब्भनें शा साफ-सुथरे शैहर दा खिताब बरकरार रक्खेआ ऐ। केंद्र सरकार दे सलाना स्वच्छता सर्वेक्षण च सूरत दुई थाहरै पर रेया, जदके नवी मुम्बई त्रीये नम्बरे पर रेया ऐ। राष्ट्रपति द्रौपदी मुर्मू होरें स्वच्छ सर्वेक्षण 2024-25 दे 9में संस्करण दे पुरस्कार अज्ज नमीं दिल्ली च लोआए गेदे इक समारोह दरान भेंट कीते। इस मौके पर बोलदे होई राष्ट्रपति होरें आखेआ जे स्वच्छता, विकसित भारत 2047 दे विजन दा सब्भनें शा महत्वपूर्ण पैहलु ऐ। 3 लक्ख थवां लेइयै 10 लक्ख तगर दी आबादी आहले शैहरें दी श्रेणी च नोएडा सब्भनें शा साफ शैहर रेआ ऐ ते ओहदे बाद चंडीगढ ते मैसूर दी थाहर ऐ। 10 लक्ख शा मती आबादी आहले शैहरें दी श्रेणी च अहमदाबाद गी पैहली थाहर मिली ऐ। ध्यानजोग ऐ जे नमें उभरदे स्वच्छ शैहरें दी श्रेणी च जम्मू गी 13मीं थाहर हासल होई ऐ।

<><><><><><>

Shah-Sahkarita

केंद्री गृह ते सहकारिता मंत्री अमित शाह होरें अज्ज राजस्थान दे जयपुर दे नेडे आयोजित सहकारिता ते रोजगार उत्सव च हिस्सा लैता। श्री शाह होरें पुलस थानें, थेआरबंद बलें, सैनिकें गी लेई जाने ते सिखलाई आस्तै इस्तेमाल कीते जाने आहली 100 नमियें पुलस गड्डियें गी झंडी दस्सी उद्घाटन कीता। उनें बक्ख-बक्ख योजनाएं दे लाहकारियें गी प्रमाण पत्र ते चेक बंडे ते सहकारिता कन्नै सरबंधत ढांचागत प्रोजेक्टें दा उद्घाटन कीता। कार्यक्रम च बोलदे होई श्री शाह होरें आखेआ जे पिछले 100 बरें थमां देश दे विकास च सहकारिता दा बड़ा बड्डा योगदान ऐ।

<><><><><><>

Delhi-ACB

दिल्ली सरकार नै पिछली आम आदमी पार्टी सरकार दे कार्यकाल दरान जय भीम मुखमंत्री प्रतिभा विकास स्कीम च कथित गडबड्डियें दी एंटी क्रप्शन ब्यूरो थमां जांच करोआने दा हुक्म दित्ता ऐ। नमीं दिल्ली च इक पत्रकार सम्मेलन गी संबोधित करदे होई आम आदमी पार्टी पर इस योजना दे तैहत कोविड-19 दरान 145 करोड़ रपे दे घोटाले दा आरोप लाया ऐ। उनें आखेआ जे मुखमंत्री रेखा गुप्ता होरें इस मसले च जांच दी सिफारिश कीती ही ते लेफ्टिनेंट गवर्नर विनय कुमार सक्सेना होरें एसीबी गी जांच दे हुक्म दित्ते ना।

<><><><><><>

US-Pre. Indi

अमरीकी राष्ट्रपति डोनाल्ड ट्रम्प होरें आखेआ जे भारत ते अमरीका बश्कार अंतरिम बपार समझौते पर चला करदी गल्लबात तौलें गै पूरी होई सकदी ऐ। उनें आखेआ जे गल्लबात स्हेई दिशा च अगगे बधा करदी ऐ ते प्रस्तावित समझौता अमरीकी कंपनियें गी अमरीका ते इंडोनेशिया बश्कार होए दे समझौते आंगर गै भारती बजारें च मती पुज्ज देई सकदा ऐ। तोआई अमरीका नै 150 देशें पर एकीकृत टैरिफ लाने दी योजना दी घोशणा कीती ऐ।

<><><><><><>

NIA-Ulfa

राष्ट्रीय जांच एजेंसी ने प्रतिबंधित उल्फा इंडिपेंडेंट आतंकवादी समूह आसेआ लाए गेदे इक आई.ई.डी. दी बरामदगी दे सिलसिले च द'उं होर लोकें गी गिरफ्तार कीता ऐ। एजेंसी नै आखेआ ऐ जे एह उपकरण गुवाहाटी दे दिसपुर च मिलेआ हा। एह पिछले साल स्वतंत्रता दिवस पर असम च कई विस्फोट करने दे बड़े षडयंत्र दा हिस्सा हा। गिरफ्तार आरोपी उल्फा इंडिपेंडेंट दी साजिश दा मकसद आतंक फैलाना ते राष्ट्र दी सम्प्रभुता, सुरक्षा ते अखंडता गी खतरे च पाना हा। एहदे कन्नै गै इस मामले च गिरफ्तार लोकें दी कुल गिनतरी 3 होई गई ऐ।

<><><><><><>

Amarnath-Yatra

श्री अमरनाथ जी दी पवित्र गुफा च अज्ज तकरीबन 5,110 श्रद्धालुएं मत्था टेकेआ। अजें तगर तकरीबन 2 लख 51 जहार श्रद्धालु पवित्र गुफा च मत्था टेकी चुके दे ना। एह जात्तरा 3 जुलाई गी शुरू होई ही। इस जात्तरा लेई मुख दे बक्ख-बक्ख हिस्सें दे अलावा बाहरले मुखे थमां बी श्रद्धालु औंदे ना। इस जात्तरा गी लेइयै लोकें च खासा उत्साह ऐ। इस जात्तरा पर औने आहले श्रद्धालुएं जात्तरा लेई कीते गेदे इंतजामें ते सेवाएं दी सराहना कीती।

<><><><><><>

Army-Amarnath-Yatri's

जम्मू-कश्मीर दिएं उच्चिणं धारें पर लगातार बने दे खराब मौसम दे मद्देनजर भारती फौज नै श्री अमरनाथ जात्रिणं दी सुरक्षा जकीनी बनाने दी अपनी बचनबद्धता गी इक बारी फी पक्का कीता ऐ। जंदे रोज संझा'लै तकरीबन सवा 7 बजे रायलपथरी ते बरारीमार्ग बश्कार जैड मोड़ थाहर लगातार बरखा करी ल्हास-पस्सियां पौने करी जात्तरा गी रोकना पेई गेआ ते खरी मती गिनतरी च श्रद्धालु बत्त फसी गे। एहदे मगरा तुरत हरकत च औंदे होई बरारीमार्ग च तैनात फौजी युनिट ने बत्ता फसे दे 500 जात्रिणं गी अपने तम्बुएं च ठैहराने दा प्रबंध कीता। एहदे अलावा ल्हास-पस्सिएं दी शैंका आहली द'उं थाहें बश्कार फसे दे इक बड़े मते कसरी जात्तरी गी खराब मौसमी हालात दे बावजूद सुरक्षित बचाइयै रायलपथरी आंदा गेआ ते उत्थुआं उसी माहिराना इलाज लेई एम्बुलेंस दे राहें अगगे भेजी दित्ता गेआ।



Fls-Katra Rail line

जम्मू संभाग च संपर्क सुविधा च बाद्दा करने ते जात्रिणं दी सखाल लेई रेल मंत्रालय नै जम्मू ते श्री माता वैशणो देवी कटड़ा बश्कार 77 इशारिया 9-6 किलोमीटर लम्मी इक बाद्दू नमी रेल लाईन लेई थाहर दे मुक्कदे सर्वेक्षण दी मंजूरी देई दित्ती ऐ। आकाशवाणी जम्मू दे संवाददाता दी रिपोर्ट मूजब सर्वेक्षण दे इस कम्मै गी अंदाजन कोई 12 करोड़ 59 लक्ख रुपें दी लागत कन्नै उत्तर रेलवे आसेआ तोड़ चाढेआ जाह्ग।



Monsoon-HP

हिमाचल प्रदेश च सक्रिय मानसून दे करी राज्य दे मते सारे इलाकें च रूकी-रूकियै बरखा बरा करदी ऐ ते औने आहले दिनें च एहदे होर तेज होने दी मेद ऐ। मौसम विभाग नै अज्ज ते कल आस्तै भारी बरखा ते येलो अलर्ट जारी कीता ऐ ते इस म्हीने दी 21 थमां 23 तरीक तगर केई जिलें च भारी बरखा दा ओरेंज अलर्ट जारी कीता ऐ।

<><><><><><>

IMD-Weather

भारती मौसम विभाग नै अज्ज मध्य प्रदेश ते उत्तर प्रदेश दे किश हिस्सें च बड़ी मती बरखा दा रेड अलर्ट जारी कीता ऐ। मौसम विभाग नै अगले 3 दिनें आस्तै केरल, माहे ते दक्खनी अंदरूनी कर्नाटक च भारी बरखा दा ओरेंज अलर्ट जारी कीता ऐ। एहदे अलावा आंध्र प्रदेश, केरल ते लक्षदीप च अज्ज किश थाहरें पर तेज हवां चलने दी संभावना ऐ।

<><><><><><>